

FLABIS ROCK di scoltâ...
par fruts cence pôre!





Il gjalut POSTIN



futura
edizioni

Al jere une volte un gjalut
che al veve di puartâ une letare.
Dopo vêle picjade ator dal cuel cuntun spali,
il gjalut al è partît, cjaminant dut stiçât e braurôs.

CHICHIRICHÌ! CHICHIRICHÌ!
AL CJANTE IL GJAL OGNI SANTE DÌ.
MA AL SALTUCE DUT STIÇÂT
CHE UNE LETARE I ÀN DÂT.
AL CHICHIRICHE, IL CHICHIRICHÌ
SI INCJAMINE PRIN DAL DÌ.



Gnaaaaaooo... i à dit un gjat li dongje:
“Dulà vâstu gjalut?”
“O voi a puartâ une letare.”
“Puedio vignî ancje jo cun te?”
“Ce sêstu bon di fâ?”
“Viodistu chestis ongulis? O sai sgrifâ!”
“Benon, metiti in code daûr di me e anin!”
E il gjalut e il gjat a van...

**GNAO GNAO, IL GJAT AL SGNAOLE
INTE CORT SI SOSSOLE.
GNAO GNAO FIN CHE AL È VIELI
SI RUSSE INTAL SORELI.
SE TU ÂS ALC DI CUISIONÂ
SGRIFI SGRIFI AL SGRIFARÀ.**





Bau! Bau!

A sintin un cjan intune cort:

“Dulà vâstu gjalut?”

“O voi a puartâ une letare.”

“Puedio vignî ancje jo?”

“Ce sêstu bon di fâ?”

“Viodistu chescj dincj? O sai muardi!”

“Benon, metiti in code daûr di me e anin!”

E il gjalut, il gjat e il cjan a van...

**BAU BAU, AL BAIE UN CJAN
JUSTE UN PÔC FÛR DI MAN.
PAI AMÎS LA CODE AL MENE
O AL RODOLE SU LA SCHENE.
ANCJE AL VUACHE FIN DOMAN
FÛR I DINCJ SE AL À FAM!**





Bee! Bee!

Un cjavron al clame di un prât:

“Dulà vâstu gjalut?”

“O voi a puartâ une letare.”

“Puedio vignî ancje jo?”


“Ce sêstu bon di fâ?”

“Viodistu chescj cuars? Vûstu provâju sul to cûl?”

“Benon, metiti in code daûr di me e anin!”

E il gjalut, il gjat, il cjan e il cjavron a van...

**BEEEEE, AL BEBEE IL CJAVRON
INTAL PRÂT AL VA A PASSON.
AL À IN BOCJE UNE MARGARITE
E AL BEBEE CE BIELE VITE.
MA I SIEI CUARS NOL À DÛL
DI PROVÂJU SUL TÔ CÛL!**



Muuu, muuu!

Si remene inte stale un taur:

“Dulà vâstu gjalut?”

“O voi a puartâ une letare.”

“Puedio vignî ancje jo?”

“Ce sêstu bon di fâ?”

**“Cui miei cuars luncs e spiçots
o soi bon di alçâ sù cualsisei robe!”**

“Benon, metiti in code daûr di me e anin!”

E il gjalut, il gjat, il cjan, il cjavron e il taur a van...

MUUU MUUU, AL MUNGULE UN TAUR


INTE MATINE DI SEDE E AUR.

TAL SO CUAR PORTENTÔS

AL À ALC DI PRODIGJÔS!

MUUU MUUU MUUU, AL MUNGULE FUART

IL SO RIÛT AL È GAIART.





Cjamine che ti cjamine, a rivin ad ôr di un bosc.
A jentrin framieç dai arbui e dopo un pôc si cjatin
denant di une cjase.
A jerin stracs, a vevin frêt e fam. No ur sarès
displasût di polsâ un moment e di meti alc tal stomi.
Però, nol coventave jessi strions par savêlu:
chê che a vevin denant e jere la cjase dai sassins!
I mûrs ducj discrostâts, i scûrs che a ciulavin,

telis di ragn dapardut: si capive benon cui che al
jere a stâ li dentri..
A cjalin prudents pe puarte in sfese: nol è nissun.
Però, par dentri, chê cjase e somee pardabon cjalde
e ospitâl..
Lis besteutis, cidinis e suspietosis,
a jentrin in ponte di pîts...



Bup, blup... Tal fogolâr e bol la mignestre inte pignate, e il gjat - che cuant che al sint clip al è content che mai - si cove dongje dal fûc.

Il gjalut, che i plâs cjalâ il mont dal alt, al salte svelt sul zîr de nape, e di li disore al sint il fûc a sclopetâ... **cric, cric...**

Il taur, grant e grues e intrigôs, si poste tal mieç de stanzie, al cjate un biel tapêt fof e, prime di pognisi, al russe lis talpis... **rasp, rasp...**

Al cjavron i plâs stâ tal ricès, alore si distire sot dal seglâr lant intor tai seglots li sot... **sdeng, sdedengh!**

Il cjan, che al à simpri chê di stâ in vuaite, si place daûr de puarte. Cuntune talpe, i da un colp e chê... **sbam!**, si siere.

Ognidun tal so puest, a polsin cuiets.

Ma cuant che al ven scûr, a rivin dongje i sassins...

O SIN I BRIGANTS CENCE PÔRE,
ROBÂ DUT E JE LA NESTRE VORE,
I SASSINS CUN SÙ I OCJÂI NERIS...
O ROBÌN IN MIL MANIERIS,
E SE MAI O VIN DI COPÂ,
LU FASÌN, NO STA A DUBITÂ.

Cuant che dome a cjapin in man la mantie de puarte,
dutis lis besteutis a dan sù cun berlis e bocjatis:
*chichirichì, chichirichì... gnao, gnao... bee, bee,
muuu, muuu... bau, bau...*

I sassins, blocâts de pôre,
che no savevin ce dal diaul
che e fos chê babilonie,
no volevin propit lâ dentri.

A fasin svelts la conte par decidi cui che al à di
jentrâ in cjase a viodi ce che al sucêt:

SANTE STRICHE DI PITICHE, DI PITOCHÉ,
CARABULE, ASINELE, BUINE VITE... FORÀ CHELE!

Chel biât che i à tocjât, al sudave e i vignive fin di
vaî... ma al jere un sassin, e nol podeve fâsi capî di
chei altris che al veve une sbigule che mai.



Alore, ben planchin, al jentre e al va bande dal fogolâr, li che al viodeve la lûs des boris.. Stant che al è di strade, al tire sù il tapon de pignate par controlâ a ce pont che e je la mignestre, ma in chêt, il gjat svelt i da une sgrifade! *Ahi! Ahi!*, al vose il sassin, tignintsi strente la man e alçant sù il cjâf.

In chel moment, il gjalut i sbitie tai voi. Il sassin, vuarp e insanganât, al cîr di lâ a lavâsi. Ma, a pene che al rive dongje dal seglâr, il cjavron i da une scuarnade che lu distire tal mieç de stanzie. Il taur lu inforcje cui siei cuars, lu tire sù e lu sdrumasse fin dongje de puarte... E li, al è il cjan che lu spiete, e che - a fuarce di muardons - lu fâs cori difûr.

“Ah, puar mai me! Ah, sacrabolt!”





Il sassin al ven fûr di cjase e al cor dut sfolmenât di pôre, e chei altris sassins daûr di lui: “Ce sucedial, ce sucedial, continus... che li dentri o vin sintût un davoï...”.


Ma chel al à cjàpât un spac che mai, e alore al tache a sglonfâle... “O soi jentrât in cjase” - al dîs chel biadaç, dut sgrifignât e pacât - “no ai viodût nissun e o soi lât dret dongje de pignate.

Li al jere un sgarzelane che mi à sgrifât la man. Dal mâl che o vevi, o ai cjalât par aiar e un muredôr che al comedave la nape mi à tirade une cjaçade di malte tai voi. O soi lât bande dal seglâr par lavâmi, e un boscadôr cu la mace par sclapâ i lens mi à dade une maçade tal cûl che mi à distirât tal mieç de stanzie. Li al jere un contadin che cu la forcje mi à impirât e mi à tirât fin dongje un fari che cu lis tanaiis mi à cjàpât e butât fûr di cjase! Ve ca, che o soi dut ruvinât! *Ahi! Ahi!*” ...



**Alore i sassins a àn vude tante ma tante di ché pôre
che ducj cuancj a son scjampâts come de muart.**

**Invezit, il gjalut, il gjat, il cjan, il cjavron e il taur a
àn cjatât bon stâ, cussì a son ancjemò li, inte cjase
dai sassins, che si cjate tal mieç dal bosc e, se no
mi crodês, o podês lâ a viodi... o pûr, sparagnait
la strade e crodêtimi a mi che us e conti!**




E la letare?

**Dopo un pôc il gjalut si è visât de letare, che cun
dutis lis aventuris si veve ancje dismenteât, e al
torne a cjapâle in man: savêso ce che e jere?
Une letare propit par te che tu scoltis in chest
moment! E diseve:**

***“Dopre ce che tu sâs, implee ce che tu âs,
ma i sassins cjapiju pal nâs!”***

Al jere une volte
un gjalut
che al veve
di puartâ
une letare...

CHICHIRICHÌ! AL CJANTE...



2018© Futura Edizioni
www.editoria.futuraacoopsociale.it

ARLeF
AGENZIE
REGIONAL
PE LENGHE
FURLANE

Proget finanziât de ARLeF
Agenzie Regionâl pe Lenghe Furlane

ISBN 978 88 98772254

